

Član 6.

Zastupnik Vijeća ministara je ovlašten pregovarati sa strankama koje sudjeluju u postupku pred Evropskim sudom za ljudska prava u Strasbourgu u cilju postizanja prijateljske nagodbe, u skladu sa članom 39. Evropske konvencije za zaštitu ljudskih prava i osnovnih sloboda.

Član 7.

Zastupnik Vijeća ministara se brine o izvršenju presuda Evropskog suda za ljudska prava u Bosni i Hercegovini i o tome obavještava Vijeće ministara Bosne i Hercegovine i Vijeće ministara Vijeća Evrope.

Član 8.

Svi organi uprave i druga tijela vlasti Bosne i Hercegovine, Federacije Bosne i Hercegovine, Republike Srpske i Brčko Distrikta Bosne i Hercegovine dužni su saradivati i pružiti svu potrebnu pomoć zastupniku Vijeća ministara i omogućiti mu nesmetan rad u ispunjenju međunarodnih obaveza Bosne i Hercegovine.

Član 9.

Ako zastupnik Vijeća ministara, povodom određenog slučaja, koji se razmatra pred Evropskim sudom za ljudska prava u Strasbourgu, utvrdi da domaći propis nije u skladu s Evropskom konvencijom za zaštitu ljudskih prava i osnovnih sloboda, obavezan je dati Vijeću ministara Bosne i Hercegovine, odnosno drugom nadležnom organu, inicijativu za usklađivanje tog propisa s Evropskom konvencijom za zaštitu ljudskih prava i osnovnih sloboda.

Član 10.

Zastupnik Vijeća ministara o svom radu podnosi izvještaj Vijeću ministara Bosne i Hercegovine polugodišnje.

Član 11.

Za obavljanje stručnih i administrativnih poslova za potrebe zastupnika Vijeća ministara osniva se Ured.

Ured prati domaće i međunarodne propise koji se odnose na zaštitu ljudskih prava, te prati i analizira praksu Evropskog suda za ljudska prava u Strasbourgu.

Član 12.

Zastupnik Vijeća ministara je rukovodilac Ureda.

Zamjenik zastupnika je zamjenik rukovodioca Ureda.

U odnosu na državne službenike i namještenike Ureda, zastupnik Vijeća ministara ima prava i ovlaštenja rukovodioca tijela državne uprave.

Zastupnik Vijeća ministara uz saglasnost Vijeća ministara Bosne i Hercegovine, najkasnije 60 dana od dana imenovanja, donosi Pravilnik o organizaciji Ureda i Pravilnik o radu Ureda.

Pravilnici iz stava 4. ovog člana se nakon dobijanja saglasnosti od strane Vijeća ministara Bosne i Hercegovine smatraju dodatkom Pravilnika o unutrašnjoj organizaciji Ministarstva za ljudska prava i izbjeglice.

U slučaju promjene pravilnika iz stava 4. ovog člana ili Pravilnika o unutrašnjoj organizaciji Ministarstva za ljudska prava i izbjeglice, pravilnici iz stava 4. ovog člana donose se na isti način kao dodatak Pravilniku o unutrašnjoj organizaciji Ministarstva za ljudska prava i izbjeglice.

Član 13.

Ured djeluje pri Ministarstvu za ljudska prava i izbjeglice.

Sredstva za rad Ureda osiguravaju se u Budžetu institucija Bosne i Hercegovine i međunarodnih obaveza Bosne i Hercegovine.

Član 14.

Ova odluka stupa na snagu osmog dana od dana objavljivanja u "Službenom glasniku BiH", a objavit će se i u službenim glasilima entiteta i Brčko Distrikta Bosne i Hercegovine.

VM broj 216/03
6. novembra 2003. godine
Sarajevo

Predsjedavajući
Vijeća ministara BiH
Adnan Terzić, s. r.

336

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", broj 38/02), Vijeće ministara Bosne i Hercegovine, na sjednici održanoj 30. septembra 2003. godine, donijelo je

ODLUKU

**O PRIHVATANJU "STANDARDNIH PRAVILA ZA
IZJEDNAČAVANJE MOGUĆNOSTI ZA OSOBE SA
INVALIDITETOM"**

I

Ovom odlukom prihvataju se "Standardna pravila za izjednačavanje mogućnosti za osobe sa invaliditetom" (u daljem tekstu: Standardna pravila, koje je Generalna skupština Ujedinjenih naroda usvojila 23. decembra 1993. godine.

II

Nadležni organi vlasti u Bosni i Hercegovini, entiteti i Brčko Distrikt Bosne i Hercegovine, obavezni su da zajedničkim djelovanjem provode aktivnosti u cilju poboljšavanja položaja osoba sa invaliditetom.

Aktivnosti nadležnih organa vlasti u Bosni i Hercegovini su utemeljene na Standardnim pravilima koja se ovom odlukom prihvataju kao polazište za kreiranje novog pristupa prema osobama sa invaliditetom.

III

Sastavni dio ove odluke su Standardna pravila.

IV

Odluka i Standardna pravila stupaju na snagu danom objavljivanja u "Službenom glasniku BiH", a objavit će se i u službenim glasilima entiteta i Brčko Distrikta Bosne i Hercegovine.

VM broj 217/03
30. septembra 2003. godine
Sarajevo

Predsjedavajući
Vijeća ministara BiH
Adnan Terzić, s. r.

STANDARDNA PRAVILA

**ZA IZJEDNAČAVANJE MOGUĆNOSTI ZA OSOBE SA
INVALIDITETOM**

OSNOVNI POJMOVI INVALIDSKE POLITIKE

1. Pojmovi koji se ovdje nabrajaju u svojoj biti počivaju na konceptima Svjetskog programa djelovanja u vezi sa osobama sa invaliditetom.

U pojedinim slučajevima odražavaju i razvoj do kojeg je došlo tokom Dekade invalidnih osoba Ujedinjenih naroda.